



Komunikadu Imprensa
10 Agostu 2023

JSMP dezamina Informasaun kona-ba prosesu justisa formál ba Autoridade Lokál no Komunitade iha Aldeia Nefobai, Suku Lifau

Iha 31 Jullu 2023, JSMP dezamina informasaun kona-ba prosesu justisa formál ba autoridade lokál no mós comunidade iha Aldeia Nefobai, Suku Lifau, Postu-Administrativu Pante-Makasar. Iha dezaminasaun informasaun ne'e kobre tópicu espesífiku ko'alia kona-ba definisaun Lei no Krime, natureza krime no oinsa atu lori kazu sira ba iha prosesu justisa formál no tipu pena.

“JSMP kontente bele realiza treinamentu ne'e ba autoridade lokál no comunidade iha Aldeia Nefobai hodi responde ba preokupasaun ne'ebé sira hato'o iha asesmentu JSMP nian bainhira serbisu hamutuk ho suku ida ne'e hodi tulun hasa'e sira nia koñesimentu kona-ba prosesu justisa formál ne'ebé sai mós hanesan parte ida iha akordu Memorandu ba Intendimentu entre suku Lifau ho JSMP iha Programa Apoiu Justisa Komunitáriu,” dehan Sra. Ana Paula Marçal, Diretora Ezekutiva JSMP.

Objetivu husi dezaminasaun informasaun ne'e atu hasa'e koñesimentu autoridade lokál no membru comunidade sira kona-ba oinsá asegura prosesu rezolve sira nia problema iha justisa komunitáriu nune'e la kontradiz ho lei justisa formál no mós oinsá bele lori sira nia prosesu ba iha justisa formál bainhira la hetan solusaun iha justisa komunitáriu ka ba prosesu sira ne'ebé ho natureza krime públiku ne'ebé mezmua sira halo ona mediasaun maibé nafatin tenke lori ba iha prosesu justisa formal.

Iha sesaun dahuluk, JSMP fahe informasaun kona-ba saida mak lei no se mak bele respeita lei, saida mak krime, natureza krime no prosesu rezolve krime públiku no krime semi-públiku. Iha sesaun daruak, JSMP fahe informasaun kona-ba oinsá lori sira nia prosesu tantu iha prosesu sivíl no kazu sira ho natureza krime espesífiku kona-ba violénsia bazeia ba jenéru.

Entretantu depoisde rona tiha JSMP nia apresentasaun, comunidade sira kestiona liu kona-ba implementasaun Lei Kontra Violénsia Doméstika (LKVD) ne'ebé mak autoriza ema seluk bele hato'o keixa bainhira mosu kazu baku malu entre feen ho la'en tanba tuir sira katak ne'e hanesan parte sira hanorin malu iha uma laran. Hatan ba ne'e, JSMP hateten situasaun ne'e

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735

www.jsmp.tl
info@jsmp.tl

Facebook: www.facebook.com/timorleste.jsmp
Twitter: @JSMPtl

akontese depoisde kuandu iha ona LKVD, kualkér krime ne'ebé envolve fe'en ho la'en, eis fe'en ho eis la'en ka ho ema seluk ne'ebé hela hamutuk iha umalanan bainhira iha dependénsia ekonómia, konsidera krime públiku nune'e ema se de'it bainhira hatene bele hato'o keixa ba polísia ka Ministériu Públiku. Komunidade seluk mós husu kona-ba tanba sa feen-la'en kuandu obriga malu halo relasaun seksuál konsidera krime enkuantu fetu ho mane klosan sira halo relasaun seksuál ne'ebé seidak kaben halo relasaun seksuál livre. Hatan ba ida ne'e JSMP esplika katak bainhira fetu ho mane ida la haree ba klosan ka kaben na'in perante halo relasaun seksuál la'os ho obriga malu entaun ne'e la'os krime esepu ba sira ne'ebé seidak atinje tinan 17.

Entretantu comunidade seluk mós husu kona-ba oinsa ho kazu baku malu ne'ebé nia prosesu ba ona tribunál maibé parte ida mai buka atu dame malu. Hatan ba ida ne'e JSMP esplika katak ba kazu hotu-hotu ita bele dame malu maibé ba kazu sira ho natureza krime públiku mezmu ita dame malu ona maibé prosesu nafatin kontinua ba iha tribunál.

Iha dezaminasaun informasaun ne'e, hetan partisipasaun husi OPS suku Lifau, xefe aldeia Nefobai, PAAS Lifau, delegadu Nefobai no membru comunidade Nefobai ne'ebé kompostu husi fetu 13 no mane 10.

Xefe aldeia no membru comunidade sira ne'ebé participa iha treinamentu ne'e hato'o katak dezaminasaun informasaun ne'e pertinente tebes tanba bele tulun sira hodi hatene oinsá bele rezolve sira nia kazu iha justisa komunitáriu no oinsá bele lori sira nia kazu prosesu ba iha justisa formál.

Atividade treinamentu ne'e realiza husi JSMP liuhusi Programa Apoiu Seguransa Komunitariu (PASK), tanba serbisu hamutuk ho The Asia Foundation (TAF) ne'ebé finansia husi Embaixada Nova Zelandia.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl